

欽定明史

卷三百  
十三之十四

原书缺页

原书缺页

於是緬始遣其臣板南速刺至進方物勞賜之二十七年置緬中宣慰使司以土酋卜刺浪爲使二十八年卜刺浪遣使貢方物訴百夷思倫發侵奪境土二十九年復來訴帝遣行人李思聰錢古訓諭緬及百夷各罷兵守土倫發聽命會有百夷部長刀幹孟之亂逐倫發以故事得已永樂元年緬酋那羅璫遣使入貢因言緬雖遐裔願臣屬中國而道經木邦孟養多阻遏乞命以職賜冠服印章庶免欺陵詔設緬甸宣慰使司以那羅璫爲宣慰使遣內臣張勤往賜冠帶印章於是緬有二宣慰使皆入貢不絕五年那羅璫遣使貢方物謝罪先是

孟養宣慰使刀木旦與戛里相攻那羅塙乘釁襲之殺刀木旦及其長子遂據其地事聞詔行人張洪等齋敕諭責那羅塙懼歸其境土而遣人詣闕謝罪帝諭禮部曰蠻旣服辜其釋不問仍給以信符令三年一朝貢初卜刺浪分其地使長子那羅塙管大甸次子馬者速管小甸卜刺浪死那羅塙盡收其弟土地人民已而其弟復入小甸遣人來朝且訴其情敕諭那羅塙兄弟和好如初母干天討六年那羅塙復遣人入貢謝罪并謝賜金牌信符勞賜遣之七年復遣中官雲仙等齋敕賜緬酋金織文綺十二年緬人來言爲木邦侵掠帝以那羅

瑣素強橫遣人諭之使修好鄰封各守疆界洪熙元年  
遣內官段忠徐亮以卽位詔諭緬甸宣德元年遣使往  
諭雲南土官賜緬甸錦綺二年以莽得刺爲宣慰使初  
緬甸宣慰使新加斯與木邦仇殺而死子弟潰散緬共  
推莽得刺權襲許之自是來貢者只署緬甸而甸中之  
稱不復見八年莽得刺遣人來貢復遣雲仙齋敕賜之  
并諭其勿侵木邦地正統六年給緬甸信符金牌時麓  
川思任發叛將討之命緬甸調兵待七年任發兵敗過  
金沙江走孟廣緬人攻之帝諭能禽獻賊首者予以麓  
川地八年總督尚書王驥奏緬甸酋馬哈省以速刺等

已禽獲思任發不解至唯以麓川地爲言朝命遂有并  
征緬甸之命是時大師已集騰衝緬使致書期以今冬  
送思任發至貢章交付驥與剋期遣指揮李儀等率精  
騎通南牙山路抵貢章受獻而緬人送思任發者竟不  
至九年驥駐師江上緬人亦嚴兵爲備遣人往來江中  
覘官軍虛實驥以麓川未平緬難不可復作乃令總兵  
官蔣貴等潛焚其舟數百緬人潰驥亦班師於是總兵  
官沐昂奏緬恃險黨賊應加兵但滇中方連年征討財  
力困弊旱澇相仍糧餉不給未可輕舉臣已遣人諭緬  
禍福俾獻賊首緬宜聽從十二年木邦宣慰罕蓋法緬

甸故宣慰子馬哈省以速刺遣使偕千戶王政等獻思任發首及諸俘馘至京并貢方物帝命馬哈省以速刺竝爲宣慰使賜敕獎勞給冠帶印信未幾以速刺奏求孟養戛里地且請大軍亟滅思任發之子思機發兄弟而已出兵爲助帝諭以機發可不戰禽宜卽滅賊以求分地弗爲他人得也景泰二年賜緬甸陰文金牌信符時以速刺久獲思機發不獻又放思卜發歸孟養朝廷知其要挾故緩之五年緬人來索地參將胡誌以銀戛等地與之乃送機發及其妻孥帝以思卜發旣遠遁不必窮追仍加賞錦幣降敕褒獎成化七年鎮守太監錢

能言緬甸宣慰稱貢章孟養舊爲所轄欲復得之帝命  
往勘貢章係木邦隴川分治孟養係思洪發所掌非緬  
境乃令雲南守臣傳飭諸部而緬甸以所求地乃前朝  
所許貢章乃朝貢必由之途乞與之又乞以金齒軍餘  
李讓爲冠帶把事以備任使兵部尚書余子俊等以思  
洪發不聞有過豈可奪其地李讓中國人而與爲把事  
亦非體宜勿許帝命兵部諭其使孟養貢章是爾朝貢  
所由當飭邊臣往諭思洪發以通道往來不得阻遏餘  
勿多望弘治元年緬甸來貢且言安南侵其邊境二年  
遣編修劉戬諭安南罷兵然緬地鄰孟養而孟養以緬

先執思任發故怨緬嘉靖初孟養曾思陸子思倫糾木  
邦及孟密擊破緬殺宣慰莽紀歲并其妻子分據其地  
緬訴於朝不報六年始命永昌知府嚴時泰衛指揮王  
訓往勘思倫夜縱兵鼓譟焚驛舍殺齋金牌千戶曹義  
時泰倉皇遁乃別立土舍莽卜信守之而去值安鳳之  
亂不暇究其事莽紀歲有子瑞體少奔匿洞吾母家其  
酋養爲己子旣長有其地洞吾之南有古喇濱海與佛  
郎機鄰古喇酋兄弟爭立瑞體和解之因德瑞體爭割  
地爲獻受其約束號瑞體爲噠喇瑞體乃舉衆絕古喇  
糧道殺其兄弟盡奪其地諸蠻皆畏服之時滅緬者木

邦孟養而與緬相抗者孟密也孟密土舍兄弟爭立訴於瑞體瑞體乃納其弟爲婿改名思忠遣歸孟密奪其兄印因假道攻孟養及迤西諸蠻以復前仇又使其黨卓吉侵孟養境後卓吉爲思真婿猛乃頭目別混所殺瑞體怒自將攻別混父子禽之遂招誘隴川干崖南甸諸土官欲入寇旣覘知有備又慮他蠻襲其後乃遁歸於是鎮巡官沐朝弼等上其事兵部覆荒服之外治以不治嗟喇已畏威遠遁傳諭諸蠻不許交通結納詔可時嘉靖三十九年也木邦土舍罕拔求襲不得怒投于緬潞江宣撫線貴聞之亦入緬瑞體自以起孤微有兵

衆威加諸部中國復禁絕之遂謀內侵乃命線貴趣召  
隴川土官多士寧士寧言中國廣大誠勿妄動瑞體稍  
稍寢未幾士寧爲其下岳鳳所殺干崖宣撫刀怡舉亦  
死罕拔乃請瑞體入干崖干崖舉則隴川可坐定也瑞  
體子應裏桀黠多智言於瑞體曰隴川干崖雖無主遠  
難猝取孟養思箇近在肘腋又吾世仇萬一乘虛順流  
下禍不測瑞體深然之因借木邦兵一萬取干崖而自  
率兵侵孟養既至屢爲思箇所敗思箇亦退保孟倫相  
持久之而隴川書記岳鳳欺其主幼私齎重賂投緬結  
爲父子蠻莫土目思哲亦迎附瑞體調緬兵萬餘出入

於迤西界上以牽制思箇復徵木邦罕拔兵會岳鳳於  
隴川襲孟密萬曆元年緬兵至隴川入之岳鳳遂盡殺  
士寧妻子族屬受緬僞命據隴川爲宣撫乃與罕拔思  
哲盟必下孟密奉瑞體以拒中國僞爲錦囊象函貝葉  
緬文稱西南金樓白象主莽達喇弄王書報天皇帝書  
中嫚辭無狀罕拔又爲緬招干崖土舍刀怕文許代其  
兄職怕文拒之與戰適應裏率衆二十萬分戍隴干間  
以其兵驟臨之怕文潰奔永昌遂取干崖印付罕拔妹  
以女官攝宣撫召蓋達副使刀思管雷弄經歷廖元相  
佐之同守干崖以防中國於是木邦蠻莫隴川干崖諸

蠻悉附緬獨孟養未下金騰副使許天琦遣指揮侯度持檄撫諭孟養思箇受檄益拒緬緬大發兵攻之思箇告急會天琦卒署事羅汝芳犒思箇使令先歸待援遂調兵至騰越箇聞援兵至喜令土目馬祿喇送等領兵萬餘絕緬糧道且導大兵伏戛戛撒誘緬兵深入箇率蠻卒衝其前而約援兵自龍川尾擊之緬兵旣敗糧又絕屠象馬以食瑞體窘甚會有陳於巡撫王凝言生事不便者凝馳使止援軍汝芳聞檄退思箇待援不至岳鳳偵知之集龍川兵二千兼程進導瑞體由間道遁去思箇追擊之緬兵大敗當是時幾獲瑞體六年廷議遣使

至孟養俾思箇還所俘緬兵象并賚以金帛好言慰諭之瑞體不謝七年永昌千戶辛鳳奉使買象於孟密思忠執鳳送緬緬遣回是年緬復攻孟養報戛撒之怨思箇以無援敗將走騰越中途爲其下所執送瑞體殺之盡并孟養地八年巡撫饒仁侃遣人招緬緬不應十年岳鳳導緬兵襲破干崖奪罕氏印俘之俄瑞體死子應裏嗣岳鳳嗾應裏殺罕拔盡俘其衆又說應裏起兵象數十萬分道內侵十一年焚掠施甸寇順寧鳳子曩烏領衆六萬突至孟淋寨指揮吳繼勲千戶祁維垣戰死又破盜達副使刀思定求救不得城破妻子族屬皆盡

且窺騰衝永昌大理蒙化景東鎮沅諸郡巡撫劉世曾  
請以南京坐營中軍劉綎爲騰越遊擊移武靖參將鄧  
子龍爲永昌參將各提兵五千赴勦并調諸土軍應援  
緬亦合兵犯姚關綎與子龍大破之於攀枝花地乘勝  
追擊自十年十月至十一年四月斬首萬餘復率兵出  
隴川孟密直抵阿瓦緬將猛勺詣綎降勺瑞體弟也緬  
將之守隴川孟養蠻莫者皆遁去岳鳳及其子皆伏誅  
官軍定隴川遂歸應裏乃以其子思斗守阿瓦復攻孟  
養蠻莫聲言復仇副使李材備兵騰衝遣兵援之戰於  
遮浪大破其象陣生禽五千餘人先是蠻莫酋思化投

緬材遣人招之思化降十九年應裏復率緬兵圍蠻莫思化告急會天暑軍行不前裨將萬國春夜馳至多設火炬爲疑兵緬人懼而退追敗其衆二十二年巡撫陳用賓設八關於騰衝畱兵戍守募人至暹羅約夾攻緬緬初以猛卯酋多俺爲嚮導寇東路至是遣木邦罕欽禽多俺殺之遂築堡於猛卯大興屯田是年緬帥思仁寇蠻莫敗之斬其渠丙測二十三年應裏屬孟璉孟良二土司求朝貢鎮巡以聞朝議令原差官黎景桂齎銀幣賜之至境不受詔以景桂首事貪功納侮下於理三十一年阿瓦雍罕木邦罕拔子罕祜俱入貢緬勢頓衰